

ТОНГ ЮЛДУЗИ

Муассислар: ЎЗБЕКИСТОН РЕСПУБЛИКАСИ ХАЛҚ ТАЪЛИМИ ВАЗИРЛИГИ, ЎЗБЕКИСТОН РЕСПУБЛИКАСИ ДАВЛАТ МАТБУОТ ҚҰМИТАСИ


Газета 1929 йил, 1 августдан «Ленин учқуни»
номи билан чиқа бошлаган

№ 33 (65860)
1995 йил, 5 сентябрь, сешанба

Сотувда
эркин нархда

**ВАТАН ТУЙҒУСИ, ВАТАН ТУШУНЧАСИ БИЗ УЧУН
САЖДАГОҲДАЙ МУҚАДДАС, САЖДАГОҲДАЙ ПОК ВА УЛУҒ БЎЛМОҒИ КЕРАК.**

И. КАРИМОВ



ҲАММА ХОНАДОНДА КАТТА ТҮЙ БЎЛДИ

ёки Юлдузхоннинг байрам таассуротлари

У билан мен «Меҳржон» боғида танишдим. Бобоси, тўрт ёшли укаси билан сайрга чиққан экан.

— Исми Санобар, бобом мени Кутлугой деб қақирадилар, — ҳикоя қилади у.

— Жонажон юртимиз мустақиллиги эълон қилинган кунлар етти ёшга тулгандим. Шундан бери Кутлугойман. Ушанда ҳамма одамларнинг бу қадар хурсандлиги, баъзилар ҳатто севинчдан йиғлаганлари бои-

сини унчалик тушунмагандим. Мана, ҳозир ўн бир ёшдаман. Озодлигимиз қанчалик буюклиги, уни авлод-аждоғларимиз қанчалик катта қурбонлар эвазига бўлса-да, орзу қилишгани ва бу йилда жонларини ҳам фидо қилишгани, неча замонлар утиб, Оллоҳ бу катта бахтни бизнинг пешонамизга насиб этганини тушуниб олдим.

— Отам тўқсон ёшдалар, — тўққинлаиб гапирди Кутлугойнинг бобоси. — Бир умр ўз

ерлари булишини орзу қилиб утардилар. Тўрт йил ичида каттагина ерга, ўз фермер ҳужалигимизга эга бўлдик. Гўшт, сут, тухум, сабзавот ва мева, ҳатто ун ҳам ўзимиздан чиқди. Отам ҳали тетиклар, биз бола-чақаларимиз билан еримизга ишлагани чиққанимизда улар ҳам бирга бордилар. Елкаларига ташлаб олган оппоқ дуррага баъзан куз ёшларини артиб Президентимизни дуо қиладилар. «Сизлар подшоҳимизни қадрига етиглар, болаларим, у доимо мамлакат тинчлигини, одамлар фаровонлигини уйлайди» деб уқтирадилар.

Халқлар дўстлиги майдонида юртимизда тинч-тотув яшаб, ишлаб, ижод қилаётган турли миллат вакиллари учратдим. Бу ерга уйғур, қозок, қирғиз, татар, немис, озарбайжон ва бошқа жуда кўп миллат маданий марказлари вакиллари чиқишган.

Корейс миллатига мансуб Инна Ли дадаси, ойиси, опаси, укалари билан сайлга келишибди. — Мустақиллигимизнинг дастлабки кунлари, — дейди Иннанинг дадаси, — «Кейин нима булар экан?» деган таҳликада қочиб қолишга ҳаракат қилганлар ҳам бўлди, ҳатто кетишди ҳам, Лекин орадан биров вақт утга, Ўзбекистонда қандай миллат булишидан қатъий назар, тинч-тотув, фаровон яшаётганлиги, бошқа озодликка эришган баъзи мамлакатларда уруш, очлик, касаллик, қувгин ҳукм сураётганини куриб қайтиб келишди. Энди «Ўзбекистон — менинг она Ватаним» дейишмоқда улар.

Навоий театри майдони айниқса болалар билан гавжум экан. Бу ерда нафис санъат лицейи ўқувчиларини ҳам, болалар техника ижоди марказлари қатнашчилари, бадий ҳаваскорлари гуруҳларини ҳам учратиш мумкин эди. Уларнинг бари ўз санъатларини намоиш этишарди.

Ҳадра майдони, Мустақиллик майдони, Ўзбекистон миллий боғи, Амир Темури майдони, эҳе, байрам қилаётган инсонларнинг юз-кўзларига қараб зақинг ошади. Юртимиз тўйида жуда кўп чет элликлар, жумладан юртимиздаги чет эл элчи-


хонлари вакиллари ҳам, бошқа меҳмонларни ҳам оилалари билан сайр қилаётганларини кўриш мумкин.

— Байраминг муборак азиз ўзбегим, яна жуда кўп йиллар доно юртбошинг етакчилигида ўз тўйингни нишонла, — дейди арабистонлик Муҳаммад Сапар Муҳаммад.

Яна бир байрам тонги отди. Кечагина ҳарир куйлақларига ранг-баранг мунчоқлар тақиб, сочларига оппоқ ленталар боғлаб ўз юрти тўйига чиққан қизалоқлар, — гузаллик тимсоллари, ҳар қандай шароитда ҳам сиполикни қўлдан бермайдиган, Ватанимизнинг бўлғуси қалқонлари, шижоатли йигитчалар бугун мактаб формаси кийиб жонажон даргоҳларига келдилар. Биринчи кўнгирак уларни Мустақиллик дарсига чорлади. Улар мустақил мамлакатимизни келгусида янада гуллаб яшнаши, жаҳондаги энг бадавлат мамлакатга айланиши, буюк давлат бўлиши учун илм оладилар. Бугун улар учун билимдон устозлар билан бирга, янгича мазмун билан бойитилган китоблар, электрон ҳисоблаш машиналари, компьютерлар хизматда. Болалар қизиқиши, иқтидорига қараб алоҳида фанлар, тиллар ўқитилмоқда.

2 сентябрда мамлакатимизнинг барча мактабларида мустақиллик дарси бўлди. Устозлар болаларга, болалар, бир-бирларига Ўзбекистон Тамғаси, Мадҳияси, Қомуси ҳақида гапириб беришди.

— Ўзбекистонимиз 1992 йилнинг 2 мартда Бирлашган Миллатлар Ташкилотига қабул қилинди, — ҳикоясида давом этади Тошкент шаҳридаги 22-мактаб ўқитувчиси Дилбар опа Ибодова. — Турли-туман вазирликлар, кумиталар, миллий банк, миллий авиакомпания, ахборот агентлиги ташкил этилди, 40 дан зиёд чет давлатлар билан дипломатик алоқалар урнатилди. Энг муҳими, юртимиз узининг тинчликсевар ички ва ташқи сиёсати билан, юртбошимиз эса оқилу донолиги, зукколиги билан дунёни лол қолдирмоқда.



БИР ҲАФТА ЯНГИЛИКЛАРИ

Ўзбекистон Президенти Исрол Каримов юртимиз мустақиллигининг тўрт йиллиги муносабати билан халқимизни қутлади.

Таниқли ёзувчи Чингиз Айтматовга қардошлиқни улукловчи асарлари учун Ўзбекистоннинг «Дўстлик» ордени топширилди.

Тошкент шаҳрида 1-Марказий Осиё ўйинлари спорт олимпиадаси бошланди.

Пойтахтимиздаги Юнусобод теннис кортида теннис бўйича Президент кубоги мусобақалари бўлиб ўтди. Унда марокашлик теннисчи Карим Алами ғолиб чиқди.

Гулистон шаҳрида теннис корти қурила бошланди.

Ўзбекистон Республикаси бош вазирининг ўринбосари, республика хотин-қизлар қўмитасининг раиси Д. Фуломова раҳбарлигидаги делегация Жаҳон хотин-қизлар конференциясида иштирок этиш учун Пекинга жўнаб кетди.

Байрам арафасида Намангандаги «Ўзбекистон» маҳалласидан 30 та беморлар ҳолидан хабар олинди. Уларга озиқ-овқат, кийим-кечакдан ёрдам берилди. «Ишчи» маҳалласидан 14 нафар жасажчиларнинг хатна тўйлари ўтказиб берилди. Охунбобоев, Алишер Навоий, «Мингчинор» маҳаллаларида ҳам кичкинтойларга саховатпешалик қилинди.



БИЛИМ — КУЧДА, КУЧ — БИЛИМДА

озод замонда яшайтган инсонлар гапи. Шаҳзода Қосимованинг ҳикояси барча синфдошларни ўзига тортди.

— Кўчамиздаги бир хонадонга Уйғур Республикаси-дан меҳмонлар келишди. Уларнинг таассуротлари чексиз эди. Юртимизнинг шифобахш ҳавоси, одамлари, мева-чеваси, хуштаъм нонлари жуда ёқибди. Шунинг учун бу ерда уч ой қолишди. Уларнинг яна битта гапи сира ёдимдан чиқмайди. Мен билан тенг Баҳоройнинг айтишича, биз фақатгина Ватанимиз бойликлари билангина эмас, меҳмондўст одамлари билан ҳам фахрлансак арзир экан.

Суратларда: Айниқса биринчи марта мактаб кучоғига қадам қўяётган 1-синф жажжиларининг қувончи бир олам. Улар бу ерга алақачон ўқиш, ёзиш, санашни билиб олиб келишган. Мактабда бўлса улар учун қизиқ нарсалар жуда кўп: биринчи ўқитувчилар, янги дўстлар, дастлабки билимлар...

Сураткаш: Р. Альбеков.



Ҳар йили ана шунақа. Ўзбекистон болалари учун қўшалоқ байрам. Кечагина қувончдан еру кўкка сиймаётган болалар бугун янгигина таъмирдан чиққан синф парталарига ўтиришади. Бир-бирларига таътилу байрам таассуротларидан ҳикоя қилишга шошилишади. Уларнинг гап-сўзларида бундан беш йил аввалги бир хилликни кўрмайсиз. Бири: «Мен дадам билан Туркия, Арабистонга бордим» деса, бири: «Мен аям билан Шинжондаги қариндошларимизни кўриб келдим» дейди. Бу гап-сўзлар бугунги ҳур,



ТОТЛИ БЎЛСАНГ, БОЛДЕК БЎЛ!

Бир киши ариқ қазийди, минг киши ундан сув ичади. Еки бир одам куприк солади, минг одам ундан ўтади. Ўзбекистон радиосининг эндиликда «Маориф ва тарбия» бош таҳририяти номи остида берилётган эпиттиришларнинг индаллосини бундан 60 йиллар аввал бир одам тайёрлаганди. Болаларга қайгуриб, узини, узлигини топганди. Аммо, ушандан бери минглаб инсонлар эзгуликка йўналди. Ақл кузи очилиб, эҳтимол, қувонди, азобланди... Аммо барибир, узини топди, узлигини яратди. Чунки «Аланга», «Бор эканда йўқ экан», «Маърифат истар кунгил», «Ҳар бола бир дунё», «Садоқат», «Имон, эътиқод сабоқлари», «Ватанни севмоқ иймондандир» каби эпит-

тиришлардан озмунча одамизод баҳра олдики? Заҳри илондек аччиқ, жонлар қурбондек — чучук тилига урганиб қолдики?

Рост, болаларга бағишланган бу эпиттиришлар аччиқ бўлса қалампирдек аччиқ, тотли бўлса болдек шириндир. Шунинг учун ҳам уйғонибоқ радио мурватини бурасиз. Гоҳ эркаланиб, гоҳ ҳаяжонланиб сизга яхши яшаш учун имконият яратинглар, билим олмақ учун, изланмоқ, интиломқ учун шароитимизни яхшилаблар, деб суйлаётган болакайлари-нинг тиниқ тилидан эриб кетасиз. Ҳаким Назир, Бурхон Зияев, Рафиқ Маҳмудов, Мели Норматов, Азиз Ёқубов, Тулқин Илҳомовлар ишлаган, қалб қури меҳр нурини болалар оламини чароғон

этишга бағишлаган бу даргоҳда эндиликда таниқли журналист Эркин Маликов сарбонлик қилмоқдалар. Эпиттириш анъаналарига содиқ қолган ҳолда янгича оҳанг, руҳ ва ранг-баранг мавзу билан ёшарган эпиттиришлар мундарижаси Ҳафиза Ҳайитматова, Абдурашид Исроилов, Муаттар Усмонова, Насиба Зиёвуддиноваларнинг сайи ҳаракатлари билан бойиетгани ҳам рост. Ҳамкасбаримиз байрам муносабати билан туркум эпиттиришлар тайёрлашди. Турли конкурслар, беллашувлар утказилди. Демак, истиқлолнинг истиқболига ишонч, эътиқод билан ёш авлодни ҳуррам қилишди. Биз ҳамкасбаримизни байрам билан қутлар эканмиз, сизга таҳририятнинг кенжа суҳандони Шаҳзод ҳақида ҳикоя қиламиз.

«ХҲҲҲҲҲ»НИНГ ҚАНДИ

— Шаҳзод радио уйига, еш суҳандонлар танловига кетди, — деди Шоира опа Ҳабибулло ақанинг саволига жавобан.

Ота сергак тортиди, кейин афсус оҳангида:

— Бекор юборибсиз-да, онаси, ахир бундай танловлардан утиш осон эмас, бекорга боланинг кунгли чўккани қолади, холос.

Кечга яқин Шаҳзод уйга ҳоргин қиефада кириб келди.

— Акажон, голиб чиқдингизми, — деди унинг ёнига югуриб келган укаси Бехзод.

— Ҳали йўқ, яна бир ҳафтача синаб қуришар экан.

Шаҳзоднинг бу жавоби оиладагиларнинг ҳаммаси учун етарли эди.

Мана, бу гап-сўзларнинг бўлиб ўтганига ҳам сал кам бир йил бўлибди.

Шаҳзод дастлаб синовга келган кунни ҳаяжонлангандан берилган матнни ўқийдиган тугилиб қолди. Шунда тажрибали режиссерлар Рихсивой ака Мирзараҳимов, Собир ака Содиков ва жонқуяр журналист Азиз Ёқубовлар унга далла беришди.

— Узи дастлаб шунақа булади, овоз ҳам аста-секин очилади дейишди.

Эртаси кунни ҳам яна омади келмади, овози гишпа бўғилиб қолса буладими... Лекин у барибир қатнайверди, радио уйидаги болажон катталар ҳам уни қайта-қайта синаб қуришаверди. Ниҳоят Шаҳзодни «Маориф ва тарбия» бош муҳарририятининг «Хурозқанд» эпиттиришига суҳандон этиб қабул қилишди. Кичик жуссаи, иқтидорли, ҳаракатчан, қизиқувчан, меҳнатсевар, чақноқ кузли болакай узининг тиришқоқлиги билан режиссерлар ва уртоқлари меҳрини қозонди.

— Устозларим Рихсивой ака, Азиз ака, Насиба опа, Ҳафиза опалардан хурсандман, — дейди еш диктор. — Улар бизни шу қадар севишадики, ҳатто узлари ёзган матнни бизга ўқитиб қуриб, қайси сўз талаффузида қийналаётган бўлса, уша сўзларни бошқа, осонроғига алмаштириб беришади. Энг муҳими, улар бизнинг уз маҳоратимиз, кучимизга ишонч пайдо қилишимизда мададкор булишади.

— Еш суҳандонларимиз жуда иқтидорли утил-қизлар, — дейди катта муҳаррир Насибахон Зиёвуддинова, — улар ҳар бир суҳанин қандай вазминликда, қандай

оҳангда, қанақа талаффузда баён қилинишини яхши биладилар, урнига қуйиб қойилмақом қилиб ўқийдилар, айниқса ширинтой Шаҳзод. Купинча унга турли-туман жониворлар овозига тақлиддан гапиришга тўғри келади. Шу қадар чиройли ухшатадики, беҳтиёр завқланиб кетасиз. «Хурозқанд»нинг қанди у.

Утган қисқа вақт ичида Шаҳзод «Табассум» радио-журналида қатнашишга, катта-катта таниқли актёрлар билан сахнадош бўлишга, яъни биргаликда роллар ижро этишга муваффақ бўлмоқда. Шаҳзод спортнинг бокс, теннис, миллий кураш турлари билан шугулланади, кун китоб ўқийди, информатика, математика унинг севган машғулот.

Шаҳзод Зоиров Тошкент шаҳри, Абдулла Авлоний номидаги мактабнинг 8-синфида ўқийди. Аълочи. Уқув даргоҳида утказилган барча тантанали тадбирларда дустларига кумакдош. Унга ҳам барча ишларида омад ёр бўлсин.

Турсуной СОЛИЕВА.

БИРИНЧИ СИНФ БОЛАЛАРИ ҲОКИМ ҚАБУЛИДА

Наманган шаҳрида ғамхурлик — меҳр-мурувват ҳафталиги бўлиб ўтди. Унда шаҳардаги кам даромадли оилалар фарзандларидан юз нафари 1-синфга бориши олдида Наманган шаҳар ҳокими, Ўзбекистон Республикаси Олий Мажлиси депутати Муҳаммаджон Каримов қабулида бўлиди. Ҳоким мустақилликнинг турт йиллигига аталган тадбирлар, уларнинг уюшқоқлик билан утаётгани, меҳр-мурувват ҳафталигининг аҳамияти, шу кунларда 64 та маҳаллада қирқдан ортиқ болаларга ҳатна тўйлари ва йигирма нафар келин-куёвларнинг никоҳ тўйлари жамоатчилик ва ташкилотларнинг ёрдами билан утаётгани ҳақида сўзлаб, Назира Аҳмедова, Мухторжон Қодиров, Соҳиба Қаюмова, Шоҳиста Абдуллаева, Баҳромжон Абдуллаев каби юздан зиёд болаларга кийим-бош, турли-туман уқув қуроллари, ширинликлар улашди.

— Ғамхурлигингиз ва совғаларингиз учун раҳмат, — деди кичкинтой Шоҳиста. — Аъло ўқишга, Ўзбекистонимизга муносиб фарзанд бўлиб етишишга сўз берамиз.

Тантанали маросимда Наманган шаҳар ҳокимининг уринбосари Дилбархон Зоҳидова, шаҳар Ёшлар Иттифоқи қўмитасининг иккинчи котиби Нигора Тожиалиева, шаҳар Халқ таълими бўлими мудири Муҳаммаджон Камолитдинов ҳамда уқувчиларнинг оналари иштирок этишди.

Турғунпўлат.
СУЛАЙМОНОВ

МАКТАБИМ, СЕНИ МАҚТАГУМ!

Анджон вилояти, Балиқчи туманидаги 5-мактаб жамоаси ҳам ҳар йилгидек уқувчиларни қувонч, шодлик билан қутиб олинди. Айниқса, мактабга илк бор қадам қўяётган 1-синф уқувчиларининг шодликлари чексиз. Қўлларида гул, ҳаяжон билан мактаб остонасига қадам қуяр эканлар, меҳрибон устозлари Коммуна опа Нурмонова, Мунаввар опа Раҳмонова уларни уз фарзандларидек очиқ чеҳра билан қутиб олдилар. Кенг, ёруғ, шинам безатилган хоналарда илмга чанқоқ утил-қизлар билим олишни бошладилар.

Мактаб директори Валижон Ҳабиллаев барчани янги уқув йили билан қутлаб: «Янги уқув йилингиз муборак бўлсин, билим олишда, ҳаётда ҳаммангизга омад ёр бўлсин!» деди.

Нилуфар ДАВИДОВА.

УНИ ЮЛДУЗ ДЕБ АТАШДИ

Май ойида Англияда утказилган скрипкачиларнинг халқаро кўрик-танловида ўзбекистонлик ёш скрипкачи Даниил Ҳолиқовнинг «танлов юлдузи» дея тан олинди ва Ўзбекистон Президенти стипендиясига сазовор бўлиши ҳаммамиз учун шарафли ҳолдир. Таҳририятимизга келатган хатларга жавоб олиш учун биз Даниилнинг устози, ҳозирги кунда Успенский номли маҳсул мусиқа мактабида ёшларга мусиқа сирларидан дарс бераётган Ўзбекистонда хизмат кўрсатган маданият ходими Натан Изяславович Миндельсонга Даниил ва ўтган кўрик-танлов ҳақида сўзлаб беришни илтимос қилдик.

— Аввало, Даниил ҳақида сўзлаб берай, — гап бошлади устоз. — У бизнинг мусиқа мактабимизда 5 синфда таҳсил олапти. Жуда тиришқоқ, зийрак бола. Ҳозир унга скрипка сирларидан дарс берайман. Ўтган кўрик-танлов ҳар икки йилда ўтказилиб, машҳур скрипкачи Й. Менухин номи билан аталади. Лекин ушбу танловга қатнашиш биз учун осон бўлмади. Даниил чалган куйлари жамланган кассеталарни конкурс ҳайъатига жўнатдик ва яна бир қанча чиғириклардан ўтганимиздан кейингина, йўланма олишга муяссар бўлдик. Энг диққатга сазовор томони шуки, Даниил Марказий Осиёдаги ягона иштирокчи ва энг ёш, энг истеъдодли ижрочи ҳисобланади. Кўрик-танловда 160 дан ортиқ давлатдан скрипкачилар иштирок этишди. Асосийси, уни танловда «юлдуз!» деб аташди. Шундай шогирд етишти-

раётганлигимиздан жуда хурсандман. Кўрик-танловдан қайтганимиздан сўнг бизни Президент девонига тақлиф қилишди ва Даниилга Президентнинг шахсий совғаси, Президент стипендиясининг гувоҳномасини топширишди. Уша лаҳзада қанчалар ҳаяжонланганимни билсангиз эди. Чунки, бу бир неча йиллик меҳнатнинг самараси эди.

Даниилнинг муваффақияти бизнинг ҳам муваффақиятимиздир, дедим, ўйланиб қолдим. Бизнинг юртимиз буюк шоирлар, алломалар, зиёлилар юрти бўлган. Бу юртдан не-не даҳолар етишиб чиққан. Жаҳонни титратган Амир Темур, назм султони А. Навоий, буюк фалакшунос олим Улуғбек... Санайверсанг тугамайди бундай қутлуг номлар. Даниилни донишманд боболар руҳи қўллади-микан? Лекин, асосийси унга қаров, эътибор бўлган. Истеъдодга парвариш бўлса, у юксалади, узини кўрсатади, ҳатто асрга татигулик ишлар ҳам қилади. Лекин... лекин олис тоғ ва саҳро қишлоқларимиздаги назардан четда қолган истеъдодлар-чи? Улар бир сурув куйининг орқасидан этигини судраб, қамиш найларини чалиб юраверадиларми?! Уларга жиддий эътибор бериш пайти келмадимикин?!

Қишлоқлардан истеъдодларни қидириб топиш, юқоридагидек мактабларни кўпроқ ташкил этиш бу каби Мустақилликка тўғналар сонини кўпайтиришга хизмат қилади, албатта.

Абдуғаффор ОМОНБОВЕВ.



Яқинда синфимизда кўнгилсиз бир воқеа содир бўлди: ўқитувчимиз Раҳбархон опа танаффус пайтида ўқитувчилар хонасига бориб келгунларича сумкасидан 300 сўм пули йўқолиб қолибди.

— Синфга бегоналар киришмайди, орангиздан биорортангиз олгансиз. Ешлик қилиб билмай олгандирсиз, қайтиб берсангиз кечираман, дедилар. Ким олганини сезиб турибман айтолмайман, кўркаман. Дарсдан сўнг тутиб олиб калтаклайди. Айтмай десам, виждоним... Айтинчи, бу ўғрилики ё шўхлик?..

Улуғбек НОМОЗОВ,
Тошкент шаҳри.

Мухарриратимизга шу ва шу мазмундаги мактублар кўплаб келиб туради. Масла-

хат сўраб мактуб йўллаётган ўқувчиларимиз, айрим ўқитувчиларимизнинг саволларига жавоб бериш мақсадида газетамизда «Хуқуқингизни биласизми?» рукни ташкил қилишни режалаштирдик ва шу мақсадда Тошкент вилояти ҳокимлиги давлат ҳуқуқ бўлими мудир Сайёра опа Хўжаева билан суҳбатлашдик:

— Сайёра опа, бу ниятимизга қандай қарайсиз?

— Ижобий албатта. Чунки вояга етмаган ўсмир йигит-қизларимиз орасида билиб-билмай жиноятга қўл уриш ҳоллари учраб турганлиги ҳеч кимга сир эмас. Уларнинг аксарияти босаётган қалтис қадмларининг кўнгилсиз оқибатларга олиб келиши ҳақида ўйлаб ҳам кўрмайдилар, моҳиятини тушуниб етмайдилар. Кейин эса кеч бўлади. Афсус-надоматдан фойда йўқ. Шунинг учун ҳам фарзандларимизга уларнинг ҳуқуқлари, шунингдек, ота-онаси, устозлари, қолаверса, жамият олдидаги бурч ва вазифалари ҳақида тушунтиришлар, йўл-йўриқ ва маслаҳатлар бериб борилса, ҳуқуқшунослар, вояга етмаганлар билан ишлаш бўлими ходимларининг чиқишлари тез-тез уюштирилиб турилса, айни муддао бўларди.

— Умумий таълим мактабларимизда ҳуқуқшунослик дарсларининг ўтилиши сизни қониқтирадими?

— Менимча, бундай сабоқларни мактабда эмас, боғча ёшиданок бериб боришимиз лозим, худди чет эллардагидек. Оддий мисол: йўл-ҳаракати қоидаларини ўргата бориш жараёнида ана шу қоидаларни бузганлик ҳам, ўртининг бирор буюмини ёқтириб қолиб, берухсат олганлик ҳам жиноят эканлиги содда қилиб, ўйинлар тарзида ўргата борилса, фойдадан ҳоли бўлмайди. Мактабларда ҳуқуқшунослик дарсларига келсак, назаримда етарли даражада ўқитилмаяпти. Дарслик ва қўлланмалар йўқ ҳисоби. Борлари ҳам юзаки ёзилган, дарс соатлари кам. Бундай дарсларни ўқитиш учун нафақага чиққан малакали ҳуқуқшунослар, милиция ходимларини жалб қилиш керак. Уларда болаларга ўргатиш учун тажриба ҳам, маҳорат ҳам етарли.

— Жорий йилнинг олти ойи давомида вояга етмаганлар орасида содир этилаётган жиноятлар тўғрисида гапирсангиз.

— Ярим йил давомидаги кўрсаткич ўтган йилдаги ярим йилликка қараганда анча паст.

Вилоят, шаҳар, туман ҳоки-

миятлари қошида вояга етмаганлар билан ишлаш комиссияларининг қайта тикланганлигини мамнуният билан қайд этмоқчиман. Соғлиқни сақлаш, ҳуқуқни ҳимоя қилиш, халқ таълими бўлимлари, маҳалла, ёшлар иттифоқи вакилларида иборат бундай гуруҳлар вилоят бўйича рейдлар уюштириб, қайси туманда жиноятчилик даражаси юқори бўлса, ана шу ерда иш олиб борадилар.

Жиноят содир этган ўсмирлар деганда, кўз олдимизга асосан ўғил болалар келади. Ачинарлиси шундаки, улар орасида қизларимиз ҳам йўқ эмас.

Улуғбек Номозовнинг мактубига келсак, ўқитувчисининг пулини ким олганини билиб туриб, айтмай, чакки қилибди. Ахир бу болаларча шўхлик эмас, бориб турган ўғрик-ку! Ўрганган кўнгил ўртанса қўймас, деганларидек, биринчи бор ҳеч ким пайқамадими, у бу ишга яна қўл уради. Бора-бора меҳнатсиз бойлик орттиришни ўзига касб қилиб ҳам олади.

— Ҳозирги кунда мактабларимизда турли хил майда-чуйда буюмлар билан савдо-сотик қилувчи тижо-

ратчи болалар ҳам йўқ эмас. Сиз бунга қандай қарайсиз?

— Келажакда бирор бир касбнинг бошини тутиш, айниқса тижорат ишлари билан шуғулланиш учун пухта билим даркор. Шундай экан, фарзандларимиз 16 ёшга етгунларича уларнинг асосий вазифалари ўқиш, ўрганишдан иборатдир. Эртанги кунлари қандай билим олишларига, қолаверса, уларнинг ота-оналарига ҳам боғлиқ. Менимча, ҳеч бир бола ота-онасининг руҳсатисиз мактабга бирор нарса олиб келиб сотмаса керак. Олди-сотди ишлари эса нафақат унинг ўзини, атрофдаги тенгдошларининг ҳам фикрини чалғитади, хаёли бўлинади, ўқиш, ўрганишга бўлган иштиёқини сундиради. Шунинг учун, халқимиз айбни яширмақчун донолар иши, адашган ақлдан озар, — дейди. Болаонларимизга «Ана-мана дегунча яхши-ёмонни билгин», — деган мақолни айтгим келади.

— Мазмуни суҳбатингиз учун раҳмат.

Ф. ЖАЛИЛОВА
суҳбатлашди.

• Болаларга қайғурмоқ — келажакка қайғурмоқдир

«БОШҚА ХОНАДОННИНГ ҲАМ БОЛАЛАРИ ТЎҚМИКАН?»



Ўзбекистон халқ ноиб, Самарқанд тумани ҳокими Раҳима ҲАКИМОВА билан мулоқот:

— Раҳима Ҳақимовна, сиз билан бутун диққат-этибор келажак авлодга қаратилаётгани ҳақида гаплашсак...

Мустақиллик нурлари кузларимизни очди, ҳис-туйғуларимизни жуш урдирди, лоқайдлик, бефарқлик уйғусидан уйғондик. Илгари келажакка, болаларимиз ҳақида қайғуриш фақат қандайдир мавҳум назариялардагина мавжуд эди. Аслида эса биз орзу қилгандай, аниқроғи, ҳозир амалга ошираётгандай эзгу ишлар қилинмаган. Энди эса амалиётга кучдик. Кимлардандир қўрқиб ё ҳадиксираб эмас, очкиччасига, яъни ҳақиқий ўзбек онаси, ўзбек отаси бўлиб болаларимизга қайғураётимиз. Ҳаёлимиздаги бор пулимизни шу эзгу ишга сарфлаётимиз. Ва ҳеч ким бизга таҳдид утказаетгани йўқ. Ақсинча, эзгу ишларимизни қўллаб-қувватлаётимиз.

— Ота-боболаримиз биз учун, бизнинг келажакимиз учун қайғурган эканлар, бизнинг авлодларга қайғуришимиз ҳам табиий бир ҳол. Биз улуг боболаримиз билан фахрланганимиз каби келажак авлод ҳам биз билан фахрлансинлар.

— Мен Самарқанд шаҳрида туғилганман. Шу тупроқда ўлганман. Бу қадимий ва муқаддас тупроқ дунё ҳарбий

санъати учун, илм-фани учун юзлаб даҳоларни берди. Улуғ жаҳонгир ҳазрат Амир Темурдай, улуг мунажжим Улуғбекдай, Ҳисрав Деҳлавий, Бедил сингари улуг зотлар ҳам мана шу тупроқдан эдилар. Яна юзлаб мутафаккирларни тилга олиш мумкин. Бу билан мен шаҳарларни бир-биридан устун қўймоқчи эмасман, ҳаммамиз учун ҳам Ўзбекистоннинг бир қарич тупроғи азиз ва муътабардир. Фарзандлари ҳам бир хил ардоқли. Фарғона тупроғи ал Фарғонийдай, Хоразм эса Мангубердидай, ал Беруний, ал Хоразмийдай, Тошкент Абдулла Қодирийдай улуг зотларни етиштириб берди. Аждолларимиз бизга эзгуликни мерос қолдирган эканлар, биз ҳам авлодларга мана шундай эзгу ишларни инъом этмоғимиз шарт. Мен аввало онаман, оналик шаъни эса ҳамма нарсадан устун туради. Қолаверса, халқимиз улуг бир инсоний бурч, яъни раҳбарлик лавозимини ишониб топширган. Оналик меҳр-муҳаббатимни халққа, келажак авлодга сарфлаш учун, орзу-ниятларимни рубёбга чиқариш учун раҳбарлик менга имконият яратиб берди. Бу имкониятлар ҳам аслида ҳуқуқимиз эзгу йўлда жорий этган қонунларининг самарасидир. Қонунларимизни амалга оширувчилари, яъни ижрочилари қанчалик дидли-фаросатли бўлса, барча бахту иқбол болаларники бўлади. Она қалбини оналаргина яхши тушуниши мумкин. Ҳар бир она қалбида фарзанди улуг инсон бўлиб етишишига умид туйғуси чуқиб етади. Фарзандларга қайғурмоқ туғилажак темурлар, улугбеклар, навоийларга қайғурмоқдир.

Учоқ бошига бориб қўлимга

капгир олганимда «Бошқа хонадоннинг учоғида ҳам шу пайт олов ёнаётганмикан?» Дастурхонга овқат келтирганимда «бошқа хонадоннинг болалари ҳам тўқмикан?» деган уй хаёлимдан утади. Ва бундай ҳистуйғу ҳамма оналарда ҳам бирдай кечади. Юзлаб даҳолар, шоирлар, олимлар, саркардалар етишиб чиққан улуг юрт эрта ё индин дунёдаги энг тараққий этган юртлар қаторига қўшилишини, фарзандлари бой-бадалат яшанишини қайси она орзу қилмайди. Бирон бир ота ё она йўқки, уз фарзандлари учун қуйиб-пишмаса.

Яқинда бўлиб ўтган йигилишлардан бирда жамоа ҳужалиги раисларидан бири қарамогиди ердан бир одам помидор ўғирлаганини ва уни жазога тортишимизни суради. Мен унга «Нега одамларни жазога тортишимиз керак, ахир бизнинг мақсадимиз жазога тортиш эмас, жазодан олиб қолиш, яъни жазони келтириб чиқарадиган шартшароитни ўрганиш ва яхши яшаш учун кумаклаш. Сиз уша одамнинг шароити билан қизиқингизми? Хонадони тўқ одам ўғирлик қилмайди!» дедим. Утирганлар сукутга толдилар. Биз бир-биримизни тушунган эдик. Бундан қувондим. Бир эл, бир юртнинг фарзандлари доимо иноқ бўлиши керак. Ўтган йили ажралли арафасида турган 63 оилани яраштирдим ва уларнинг кейинги ҳаётлари билан ҳам қизиқиб турдим. Етишмовчиликларига ерданлашдик. Бу билан неча-неча гудакларни етимликдан асрадик.

— Модомки гап болалар ҳақидаги эзгу ишларга тақалар экан, шу йўлда тўғаноқ бўлаётган тўсиқларга ҳам тўхталмасликнинг иложи йўқ. Масалан,

баъзи ота-оналарнинг фарзандлари ҳаётига бефарқ қараши, яширинча гиёвандликка сабаб бўлувчи ўсимликлар экишлари ва уни сотишлари каби...

— Албатта, бу борада ҳам Президентимизнинг улуг ташаббуслари ҳақида гапирмаслик мумкин эмас. Турли зарарли гиёҳларни яширинча экиш ва сотиш, натижада ёш вужудларни майиб-мажруҳ қилиш иллати собиқ Иттифок даврида кенг тарқалган. Фақат яшириб келинарди. Ва бу иллат мустақилликка эришганимиздан кейин ҳам бир оз вақт давом этди. Мана, икки уч йилдирки, бунга қарши жиддий ва қаттиқ кураш бошланди. Ижобий натижаларга ҳам эришилди. Ўз-ўзидан савол туғилади. Уша зарарли гиёҳларни яширинча экадиган кишилар уларни кимларга сотади? Уни кимлар қабул қилади? Табиийки, уларнинг уз болалари. Бундан ким фойдаю ким зиён кўради. Бу фожеани чуқур ҳис қилиш ва тушуниш учун аввало баъзи ота-оналаримиз юксак инсоний маданиятга эришган бўлмоғи керак. Бордию фарзандларимиз орасида ҳулқи бузуқликлар содир бўлса, биргалашиб уша фожеанинг олдини олишга киришимиз зарур. Агар бирон-бир она уз фарзандига нисбатан бефарқ бўлса, демек у бирон-бир таъсир оқибатида бўлган бўлади. Ҳайриинсоний таъсирларга берилмаган оналар эса доимо уз боласининг қисматини эътибордан қочирмайди. Дунё кенг, одамизод сонсаноксиз. Ҳали ер юзида болалар кучаларда туғилиб, кучаларда улгайиб, кучаларда олиб кетадиган юртлар ҳам бор.

Худога минг бор шукурлар бўлсинки, эсимни таниганим-

дан буён бундай кўнгилсизликнинг тувоҳи бўлмадим. Халқимиз доим иноқ, толиққан кезлари бир-бирининг бағрига қиради. Иқтисодий танглик юз берганда ҳам, ҳозир ҳам ҳуқуқимиз болаларга ердан беришни қанда қилгани йўқ. Мактаблар, болалар боғчалари аввалдан яхшироқ фаолият кўрсатаётир. Масалан, ўтган йили туманимизда 8 та янги мактаб биноси ишга тушди. Бу йил эса урта. Насиб этса улуг Навруз кунларига яна 2 та ўқув даргоҳини топшириш умидимиз бор. Туманимиздаги анчагина ташкилотлар мактаблар болаларини уз оталиқларига олишган. Жумладан, ҳокимият ҳам 2000 ўқувчига уст-бош совға қилишни зиммасига олган. Худудимизда 65 та мактаб бор. Уларда 92 мингта яқин бола билим ва тарбия олади. 3,5 минг ўқитувчи уларга устозлик қилади. Қўллаб болалар боғчалари ишлаб турибди. Бундан ташқари сил касали билан оғриган болаларни ҳам даволаш, ҳам ўқитиш учун 80 уринли интернат ҳам ишлаб турибди. Битта лицей гимназия эса чет тилини ўргатади. Болаларга қайғуришдек муқаддас туйғуни Оллоҳ биз оналарга насиб этган экан, у улуг зотга фақат шукроналар айтишимиз керак. Бу йўлда мен барчага бирдай эзгу тилаклар тилаб қоламан.

Бордию ҳозирги кунларда болалар учун чиқариладиган ойномалар, рузномалар тақчиллик сезсалар, марҳамат, кўп қатори бизлар ҳам ерданга тайёримиз.

— Сизга чин қалбдан миннатдорчилик билдираимиз.

Суҳбатдош: Усмон АЛИ.

ҚАЛБНИ «ЖИЗ» ЭТКИЗГАН САТРАЛАР — МАКТУБЛАРИНГИЗ УЧУН ТАШАККУР

Дорилфунунда ўқий бошлаган дастлабки кунларда устозлардан бири: «Ёзган хабар ёки лавҳангиз, репортажингиз бўлсин, унда қалбни «жиз» эткизадиган локал бирор сатр ҳам бўлмаса, демек сиз ёзмаёқ кўя қолинг» дегандилар.

Бизга мактуб йўллаган аксарият ўқувчиларнинг мактубларини ўқир эканмиз, мухтарам устознинг уша сўзлари яна бир бор ёдга тушарди.

Сабаби қуйида номларини келтирмоқчи бўлган муаллифлар мактубида у ёки бу даражада одамни ҳаяжонга соладиган сатрлар бор.

Дастлаб қўлимизга олган мактуб муаллифи саволларига албатта газета орқали жавоб беришимизни илтимос қилган.

«Севиш айбми», деб ёзди Сирдарё вилояти, Боявут тумани, Алишер Навоий номидаги 31-мактабнинг битирувчи синф ўқувчиси Холида Бобоқулова. — Мен бир йигитни севардим, лекин бир тентак қизнинг гапига кириб мени унутди.

Холидахон, сиз яна хатингизда «Мен ўзимдан катта ёшдаги кишиларга шу саволни бердим. «Севиш айб» дейишди. Севги ҳақида шеър ёзгандим, кичик опам топиб ёқиб ташлабди» деб ёзгансиз.

Энди... келинг бир воқеани айтиб берай-да, ўзингиз хулоса чиқаринг. Синфимизда бир қиз бор эди. Унинг хусни Лайлию Шириндай эмасди-ю, лекин ахлоқ-одоби, аъло ўқиши, ширинсўзлиги, чеварлиги, пазандаллиги билан ҳам устоз, ҳам ўқувчилар оғзига тушганди. Ҳамма болалар уни ҳурмат қилишарди. Аммо у битта синфдошимга бошқачароқ қарар, дилидагини фақат менга айтарди. Битириш имтиҳонлари тугаши арафасида ҳамма болалар унга мактуб ёзишди. Мактублар орасида у кутгани ҳам бор эди. Бироқ дугонам битта хатга ҳам жавоб бермади. Бундан умидлари пучга чиққанлар тезда ўзларини тортишди. Болалар орасида фақат битта, уша дугонам эътиборини тортган йигитгина унинг кетидан қолмади. Улар турмуш қуришди. Бизнингча,

севги Оллоҳга бўлса ҳам, одамларга бўлса ҳам қалбда пинҳона сақланмоғи зарур. Бундан ўзингиз хулоса чиқараваринг. Катталарнинг «севиш айб» дейишгани, опангизнинг севги ҳақидаги шеърни ёқиб ташлагани сабаби «юрагида севги бор инсон айниқса қиз бола барчага аюҳаннос солмайди» дегани бўлса ажаб эмас.

Иккинчи мактуб муаллифи Хоразм вилояти, Янгиариқ тумани, Жаббор Йулдошев номидаги 21-мактаб ўсмирлар етакчиси Фарида Маткаримовадир. Аввало биз Фаридахонга катта миннатдорчилик билдирамиз. Бунинг боиси, муаллиф ўзининг 11 саҳифадан иборат мактубида турлича мавзуда лавҳа битиб, уларда мактабдаги олиб борилган энг ибратли ва қизиқарли ишлар ҳақида атрофлича ҳикоя қилиб берган. Афсуски, бу хат бизга анча кечикиб етиб келганлиги сабабли, фойдаланишнинг имконияти бўлмади. Умид қиламизки, Фаридахон келгусида бизнинг энг жонқуяр мухбирларимиз қаторида фаолият кўрсатадилар.

Шунингдек бизга Бухоро вилояти, Жондор туманидаги 30-мактаб ўқувчиси Беҳзод Тўхтамуродов, Гиждувон туманидаги 44-мактаб ўқувчиси Расул Тўқов, Тошкентдаги 218-мактаб ўқувчиси Шоира Шокирова, Бухоро вилояти, Шофиркон туманидаги 23-мактаб ўқувчиси Муниса Ҳуроқова, Тошкент вилояти, Бекобод туманидаги 12-мактаб ўқувчиси Манзура Гойипова, Жиззах шаҳридаги ёш ижодкорлар уйи қатнашчиси Феруза Эшонқулова, Бухоро вилояти, Гиждувон туманидаги 40-мактаб ўқувчиси Гулноза Шаропова, Хоразм вилояти, Гурлан тумани, Усмон Юсупов номидаги мактаб ўқувчиси Муҳаббат Жумабоева, Бухоро вилояти, Гиждувон туманидаги 17-мактаб ўқувчилари Наргиза Давронова, Толиб Саидов ва бошқалар мактублар йўллашган.

Биз уларга ташаккур ва миннатдорчиликларимизни билдирар эканмиз, бундан буён ҳам уларнинг мазмунли мактубларини кутиб қоламиз ва уларнинг ҳар бир сатрини эътибордан четда қолдирмаймиз.

Т. ҲАМИД ҚИЗИ

• Бозор иқтисодиётини ўрганамиз

САВДОГАРЛИК — ҲАЛОЛЛИК

Биздан анча наридаги маҳаллада Ҳалима хола деган аёл буларди. Унинг катта туғуни ҳар доим турли-туман ноёб буюмларга тула булар, бу нарсаларнинг бари шаҳримиз дуконларига аҳолига сотиш учун келтирилган бўлиб, Ҳалима хола сингари уша замон тили билан айтганда «савдогар»лар қўлига «шапка» қўйиб чиқарилган буларди.

Баъзилар у келтирган нарсаларни ноилж, яъни дуконларда йўқ бўлгани учун харид қилиб олар, баъзилар эса «инософсиз савдогардан қиммат нархда оламанми?» дея тесқари угирларди. «Савдогар» сузига салбий муносабатда бўлиш уша даврларда шунинг учун авж олган эди.

Ўзбекистонимиз мустақил бўлгач, ҳаммага чет давлатлар сарҳадларига бемалол чиқишга имкониятлар яратилди. Ҳалима хола энди Қозоғистон, Қирғизистон, Арабистон, Хитой сингари мамлакатлардан турли-туман буюмлар, кийим-кечак, матолар олиб келиб сота бошлади. Дарвоқе, у молларини бозорда сотиш учун рухсатнома ҳам олган. Энди холадан ҳеч ким нафратланмайдиган, буюмларини ҳам бемалол харид қиладиган бўлишди. «Ҳалима хола аввал чайқовчи эди, энди савдогар бўлди, чунки меҳнат қилиб, азоб ва заҳмат чекиб шаҳарма-шаҳар кезади-да» деди бир аёл саволимга жавобан.

Бу гапдан хулоса шуки, аввалги жамиятда чайқовчиликни савдогарлик билан аралаштириб юборилар экан. Демак, чайқовчи тайёр буюмларни арзон нархда сотиб олиб, унга яна қўшимча нарх

қўйиб бошқатдан сотса, савдогар йўл машаққатларини тортиб, узоқ улкалардан уз халқининг эҳтиёжлари учун зарур бўлган нарсаларни олиб келар экан. Лекин савдогарлик касбининг шарафи шунинг узи билан оқланмайди. Савдогарлар зиммасига тушадиган масъулият ниҳоятда каттадир. Тарихимиздан маълумки, савдогарлар азал-азалдан ўзларининг маърифатликлари, олийҳимматли эканликлари, одамохунликлари билан донг таратганлар. «Қобуснома»да бу ҳақда қўйилган фикр билдирилган: «... савдогар мағрибдан машриққа бориб халққа озиқ-овқат келтиради, жаҳоннинг ободлиги шу билан вужудга келади, бу ишни савдогардан бошқа халқ эмас билмайди». Савдогарнинг маънавияти қандай бўлиши ҳақида эса: «... савдогар қайси шаҳарга борса, ешон хабар тарқатмасин, ҳатто таъзия хабарини ҳам айтмасин, шодлик хабарини айтишда нуқсон қилмасин... ростлик ва диёнатликни савдо ишида сармоядек билсин... Хиёнатдан қочилки, кимки бир марта хиёнат қилса, унга ҳеч кимнинг эътиқоди қолмайди, турлиликни ўзинга касб қилиб олгилки, турлилик энг яхши ишдир... Олди-сотдида мулоийм бул ва кишига ваъда қилмагил, ваъда қилсанг, унга хилоф этмагил. Харидорга ёлгон суз демагил, ростини айтгил...», — дейилари.

Савдогар сузининг маъно жиҳатидан таҳлил қиладиган бўлсак, у савдо жараёнида учрайдиган барча паст-баландликлардан хабардор, йўлда учрайдиган қийинчиликларни тадбиркорлиги билан енга олиш

қобилиятига эга бўлган уз ишининг устасидир. У қаердан мол олиб келиб қаерга сотишни, пул қалбини ва унинг қалбаки эмаслигини ажрата оладиган, олаётган молини сифатини яхши аниқлай олиш қобилиятига эга бўлиши доимо унинг ишини ривожланишига олиб келган. Шу билан биргача унинг ҳаётидаги савдо ишлари доимо таваккалчиликка асосланган. Бу масаланинг бир томони. Иккинчи томони эса унинг маънавиятидир. Унинг юриш-туриши, муомаласи, бир сузлилиги, ҳалоллиги, эътиқодининг мустаҳкамлиги ва илми муруввати ва ҳоказо. Бу икки жиҳатнинг қўшилиши натижасида у халқ орасида эътиборли савдогарга айланади.

Аждодларимиз қурган бинолар, улар қолдирган маънавий меросимизда утган савдогарларимиз хизмати катта эканлиги ҳақида уйлайман. Чунки улар шаҳарма шаҳар юриб бошқа халқларнинг яшаш тарзи, маданияти, урф-одатларини, у ердаги ишлаб чиқаришни, бошқа халқлар тилини ўрганиб, ёзган китобларини келтиришган. Шу билан халқларнинг маданияти, турмуш тарзи ривожланган. Қайсики халқ орасидан қўлаб савдогарлар чиққан бўлса, шу халқнинг маданияти ривожланиб, турмуши фаровон кечганлиги тарихимиздан маълумдир.

Баҳодир ЗИЯЕВ,
Тошкент Давлат аграр
университети доценти.

ДАРОМАД КЕРАКМИ, МАРҲАМАТ!

Ўқувчилар ўйланиб қолишди. Мактаб ўсмирлар ва ёшлар уюшмаси фондига қандай қилиб даромад келтириш мумкин? Улар ўз мулоҳаза ва истакларини С. Турсунов номидаги деҳқон хўжалиги уюшмаси раисига айтишди.

Раис болаларнинг мақсадларини дарров тушунди. Уларга тажриба майдони сифатида 2 гектар ер ажратилди.

Пастдарғом туманидаги 67-мактаб директори Х. Қодиров

ўқувчиларга мададкор ва кўмадош бўлди. Унинг ташаббуси билан ернинг катта қисмига 400 туп олма ва қароли, 0,40 гектар майдонга 17000 туп терак қаламчалари, боғ қатор орасига эса тарвуз, қовун, ошқовоқ, 0,20 гектар майдонга эса уруғлик пиёз экилди. Ўқувчилардан Ҳилола Ражабова, Дилмурод Ражабов, Наргиза Суярова, Наима Набиева, Уткир Остонов, Гулнора Қодирова, Шоҳиста Норбоева, Гулбахор Эшонқулова дарсдан бўш

вақтлари, ёзги таътил даврида ҳам экинларни парвартиш қилишда меҳрларини аямадилар. Натижа ёмон бўлмади. 14,5 килограмм сараланган пиёз уруғини йиғиштириб олиб келишувга асосан деҳқон хўжалиги ихтиёрига топширдилар. Бордан юқар, болдан томар, — деганларидек, ўқувчилар хўжалик кузда санайдиган паллада қуруқ қолмасликларига ишонамиз.

Адолат РЎЗИМАМАНОВА.

Юнус ака Муҳамедов асли шифокор. Шифо излаб келган беморлар дардига малҳам бўлиш билан бирга, кўплаб мақола, хабар ва лавҳалар ёзиб матбуот нашрларида қатнашиб турадилар. Юнус аканинг айниқса, болаларга меҳри бўлакча, улар билан соатлаб суҳбатлар қурадилар. Болажонларга атаб таълим-тарбия, саломатлик бобида насиҳатомуз митти шеърлар ҳам машқ қиладилар. Қуйида табиб-шоиримизнинг сизга атаб ёзилган шеърларидан намуналар ўқийсиз.

БАҲОЛАР БАҲСИ

«1» баҳо:

Дўстларим йўқ, яккаман.
Барча мenden қочади.
Яқинлашсам уларга
Нафратларин сочади.

«2» баҳо:

Биз яккадан кам эмас
«Икки» дерлар исмимиз.
Ҳеч ким бизни хушламас,
Чунки гамгил юзимиз.

«3» баҳо:

Биз «уч» деган баҳомиз,
Яхши эмас, ёмон ҳам

Аросатда қолганмиз,
Дардисармиз, вассалом.

«4» баҳо:

Биз «тўрт»ликмиз, тугалмиз
Дадил қадам ташловчи.
Билимларни ўргатиб,
Эзгу йўлга бошловчи.

«5» баҳо:

Биз «аълочи» номимиз
Юлдузлардек порлаймиз.
Қолоқларни етаклаб,
Илғорликка чорлаймиз.

Юнус МУҲАММАД ўғли.

ТОНГ ЮЛДУЗИ
Ўзбекистон болалари ва
ўсмирларининг газетаси

Бош
муҳаррир
Умида
АБДУАЗИМОВА

Таҳрир хайъати:
Наримон ОРИФЖОНОВ,
Феруза ЖАЛИЛОВА,
Раҳима ШОМАНСУРОВА,
Марат ШАФИЕВ,
Сайриддин ХОЛОВ
(масъул котиб)

ИВМ компьютерида терилди ва
саҳифаланди. Офсет усулида
босилди. Ҳажми 1 босма табоқ
Буюртма — Г 0397.
11.000 нусхада босилди.
Қоғоз бичими — А-3.
Босишга тошириш вақти 19.00
Тоширилди — 18.30

• Рўйхатдан ўтиш тартиби
№ 000137
• Манзилимиз: 700083,
Тошкент шаҳри,
• Матбуотчилар кўчаси,
32-уй.
• Телефон:
• 33-44-25